

Engaschament social e cultural fiss periclità

La regenza è pronta d'examinar alternativis tar la taglia da cultus

DA MARTIN CABALZAR

■ **Cun la taglia da cultus incassada da las personas giuridicas finanzieschan las baselgias cantunales (catolica e reformada) ina gronda part da lur engaschament social e cultural. Sin intervenziun da la fracziun liberaldemocratica dal cussegl grond è la regenza grischuna pronta d'elavurar in rapport per finanziaziuns alternativis sche l'iniziativa dals giuvens liberals avess da vegnir acceptada.**

Enconuschentmain han ils giuvens liberals inoltrà l'iniziativa per abolir la taglia da cultus da las personas giuridicas. Tenor il schef da fracziun *Rudolf Kunz* (pld Cuira) crititgeschan ils giuvens cun raschun ch'ina interpresa na possia vairmain betg avair ina religiun e na possia uschia era betg vegnir obligada da pajar ina taglia da cultus. En connex cun l'iniziativa dals giuvens liberals che ha la finamira da liberar las personas giuridicas (interpresas) da la taglia da cultus haja la regenza argumentà che las baselgias chantunales na possian betg dumagnar talas perditas da taglia. In argument che vegnia tratg a strada savens en quest connex saja ch'il mantegniment e la renovaziun dals edifizis ecclesiastics che sajan per il pli istoricmain e culturalmain fitg prezios daventian pli e pli ina incumbensa pretensiusa da las baselgias, remartga *Rudolf Kunz*. Tenor la regenza vegnian era numerusas incumbensas socialas finanziadas tras las taglias da cultus.

Discrepanza tranter giuvens liberals e la partida-mamma.

L'iniziativa per dismetter las taglias da



Deputà **Rudolf Kunz** (Cuira) dirigia actualmain la fracziun liberaldemocratica dal cussegl grond.

FOTO Y. BÜRKLI

cultus per personas giuridicas deriva dals giuvens liberals. Els na vegnan dentant betg sustegnids da lur partida-mamma. Cun 37 cunter 30 vuschs recumonda la pld grischuna numnadain da refusar l'iniziativa da sia secziun da giuvenils.

Tenor *Rudolf Kunz* na dementescha la pld betg ils arguments exprimids dals adversaris da l'iniziativa en il messadi da votaziun. Ella renconuscha bleranz la situaziun finanziaria da las baselgias chantunales che han era l'obligaziun da mantegnair ils bains culturals prezios. Per *Kunz* para quest argument che serva a

cumbatter l'iniziativa quasi sco in «signal d'alarm» che valia d'examinar pli detagliadamain. *Rudolf Kunz* suppona dentant che la finanziaziun dal mantegniment da bains culturals prezios da las baselgias chantunales dastgass esser smantschada en il futur er sche las taglias da cultus restan. Ultra da quai vegnian liads meds finanziarials considerabels per quest sector. Quests meds finanziarials liads – ensem cun ils auters facturs – difficulteschan puspè d'ademplier vastas incumbensas socialas.

En quest connex pensa la pld er al

chal da commembers da las baselgias chantunales pervi dal grond dumber da religiuns, pervi da l'immigraziun d'autras cuminanzas religiusas, pervi da la diminuziun da las naschienschas etc. Dentant era la prontezza d'appartegnair ad ina baselgia dastgia vegnir menziunada. Quai sa manifesteschia cunzunt tar l'augment da las personas che sortan da la baselgia. Era daventia la taglia da cultus, che saja da princip fallada, er adina pli problematica per interpresas internaziunalas ch'èn activas en Svizra.

Co duain las baselgias financiar lur incumbensas en il futur?

La fracziun liberaldemocratica è perquai da l'avis ch'i vegnia a sa tschentar en il proxim avegnir la dumonda co che las baselgias chantunales vegnian a pudair financiar en l'avegnir lur incumbensas creschentas. En quest connex stoppian ins era sa dumandar quant enavant ch'i dettia dublicitads sin quest champ tranter la baselgia ed il stadi che sa laschian evitar, tira *Rudolf Kunz* en consideraziun.

28 deputads da la pld vulan perquai incumbensar la regenza da stimar il svilup finanziar per las baselgias chantunales a vista mesauna ed a lunga vista. En quest connex stoppian ins er inditgar las consequenzas pussaivlas e deducir la ristga finanziaria per il stadi e per las baselgias sco era da preschentar las mesiras che sa resultan per schliar la problematica a lunga vista.

La regenza respunda

En sia resposta constatescha la regenza

che dapi l'introducziun da la taglia da cultus l'onn 1959 sa finanzieschan las baselgias chantunales dal Grischun per gronda parta da questa fontauna. «Questa daglia è daventada necessaria perquai che tant las duas baselgias chantunales sco era blers cumins-baselgia sa chattavan quella giada en ina situaziun finanziaria precara e quai malgrà che las personas natirales eran gia suttamessas ad ina ferma grevezza tras la taglia da baselgia», scriva la regenza. La creaziun da la taglia da cultus ha quella giada meglierà entaifer pauc temp cleramain la situaziun finanziaria.

**54,34% per ils catolics,
45,66% per ils reformads**

Las taglias da cultus che vegnan incassadas vegnan assegnadas a las duas baselgias chantunales en la proporziun dals commembers tenor il register da taglia da las personas natirales. La fin da 2012 correspundeva quai a 54,34% per ils catolics e 45,66% per ils reformads. Tar la baselgia catolica dal Grischun importa la part da las taglias da cultus actualmain a radund 90 pertschient da tut las entradas.

La regenza è cunschenta da las perditas financialas sensibilas per tuttas duas baselgias chantunales, e quai tant sin il champ social sco er en ils secturs culturals. Ella renconuscha perquai er il bassegn d'agir sche l'iniziativa dals giuvens liberals vegniss acceptada. Perquai è ella pronta d'elavurar en collavuraziun cun las baselgias chantunales in rapport davart la finanziaziun futura da las incumbensas actualas da las duas baselgias chantunales.